



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7



Rishabh Pant Lucknow Super Giants captain kumogo



America nunger kum pezü ajema akumba atemtsü: Donald Trump

VOL. XXII ISSUE NO. 97 (ADOK 97)

DIMPUR

SANGTENNÜ (TUESDAY)

AENJETI (JANUARY) 21, 2025

₹ 5.00

Nagaland NPP lennirtemi Congress nung aden

Kohima, January 20, 2025 (TYO): Nationalist People's Party (NPP) Nagaland unit nungi lennir 15 tashi Hombarnü Congress Party nung denogo.

Congress Bhavan nung osangbener senden ka nung Nagaland Pradesh Congress Committee (NPCC) President aser Lok Sabha MP, S. Supongmeren Jamir-iba osang metetdaksü. Külen, NPCC working president Khriedi Theunuo-i züngsem tasentem pelashishia agizük.

NPP lennirtemi Congress nung adentsü lemtetba ajanga Nagaland nung Congress asoshi lenmang tasen ka lapokogo ta Supongmeren-iba ashi.

Congress party-i nübertem tenzüksü tenanzükba lir aser item lanur lennirtemi pusema tejakleni aotsü ta pai ashi.

Iba ya Nagaland nung Congress atema mera tulu ka lir aser NPP lennirtemi Congress nung adenba ajanga party tashi itdaksür ta NPCC Working President Khriedi Theunuo-iba ashi.

Rahul Gandhi lenisüba kübok party-i linük len anir aser nübor tebilemtsü atema bendanga agüja inyaker ta paisa ashi.

Tanü Congress Party nung adener rongnung NPP Nagaland Vice President, Bitong Sangtam, aser NPP General Secretary (Organization), L. Hiketo Shohe na dena lir.

"NPP dak temulung malemba

agi masü saka yimtenren tsütsü jenjang tajungba akümtsü aser nübor tenzüksü maangka angutsü atema Congress nung adentsü lemtet. Congress tarutsü tajung lir aser party takok angutsü atema meranga inyaksü" ta Bitong Sangtam-iba ashi.

NPP tejakleni maoba aser election nung teimla balaka majitetba ajanga iba party toktsür ta L. Hiketo Shohe-iba ashi.

Onoki Congress mangdang aser tangatetba nung tamang akar aser Nagaland renloka aotsü aser shilem agitsü atema Congress-i ang sabang tajungba agütsür ta paisa ashi.

Rahul Gandhi lenisüba atema tetushi agütsür aser Bharat Yatra dena pai inyakba maparen ajanga Northeast nung kanga nungdakba lenisüba sayuogo ta Shohe-iba ashi.

Congress nung adenba NPP züngsemtemji Bipin Kumar Sha, Secretary, Akito Chishi, Secretary, Khikai Zhimo, Media Secretary to GS Org, Illina Shohe, Mahila State Executive Member, Toli S Achumi, Ex-DMC Candidate, Heto Achumi, Vice-President, NPYF, Jaser Meru, General Secretary (Org.) NPYF, Justin Lotha, GS Admin NPYF, Akahito Chishi, Secretary (Org.) NPYF, Kavito Swu, Secretary Admin. NPYF, Amento Kiba, Secretary NPYF, Imtimeren Imchen, Member, NPYF aser Sarah Zhimo nunger lir.

Nagaland Congress-i Protected Area Permit atema jembitsü



NPCC president & Lok Sabha MP Supongmeren Jamir (achiji) aser NPCC working president Khriedi Theunuo.

Kohima, January 20, 2025 (TYO): Centre-i Nagaland nung Protected Area Permit (PAP) tanaben benokba atema tebilemtsü abener aser iba onük ya Parliament nung Lok Sabha MP Supongmeren-iba benoka jembitsü ta NPCC-i metetdaksüogo.

India sorkari December 17, 2024 nü Nagaland nung PAP tanaben benokba atema osangbener den jembidang Nagaland Pradesh Congress Committee (NPCC) Working President Khriedi Theunuo-iba osang lemsatop.

Nagaland nung PAP tanaben benokba atema tebilemtsü tulu abener aser iba ajanga Nagaland nung tourism, investment aser linük kübok tanungba tesem den connectivity nung kongshitsü ta

pai ashi. "Nagaland-i domestic aser international tourists aika arur aser iba ya talisa Hornbill Festival benjungtem nung arur. Tangalen nungi Nagaland-i nisung talila aruba, shishilembatsü tenzükba aser tajungba metettsü merangba mapang ka PAP benokba ajanga asenok linük dang nungi pilaa odaksür ama bilemer" ta Theunuo-iba ashi.

Iba policy ajanga Nagaland renlokba nung tetsükdaksü agütsütsü aser tanga tesentem aser linüktem den tesentaktep nung kongshitsü ta Congress-ibo bilemer. Anungji Ministry of Home Affairs (MHA) aser Parliament-iba lemtet meyipa repringshitsü mepishir ta paisa metetdaksüogo.

Parliament Budget session nung Congress-i iba onük benoktsü ta Nagaland nungi

Congress MP aser NPCC President S. Supongmeren Jamir-iba ashi.

"Party-iba ya Parliament nung benoktsü lemtetogo. Taoba Parliament session nunga Congress-i Indo-Myanmar artsülen Free Movement Regime (FMR) agienba indang takok nua jembigo aser maneni PAP onük benoka jembitsü" ta Supongmeren-iba ashi.

Nagaland aser Myanmar nung aliba Naga nungertem aser talisa Noklak o Mon district tem nung alirtemi sendaktepa lir. Nisung o nisung na tsüngda atsü atsüdangtsü melena tanga lenmangtem bushiteptsüla, ta paisa ashi.

Nagaland sorkari January 6 Cabinet lemtet ka ajanga MHA dang Nagaland nungi PAP agientsü atema mepishitsü telemtetba ka agiogo.

Nagaland aser tanga northeast state kar nung PAP ya 1960s nungi bentshia aru aser December 1, 2021 nü agiena liasü.

Iba ajanga bendangertemi Nagaland aser tanga northeast state temi permits melii arutet. Ajisüaka, kum asem lir külen MHA-iba Nagaland, Manipur aser Mizoram atema PAP tanaben benokogo.

Mkg aser Chare tsüngda lenmang shibanger

Dimapur, January 20, 2025 (TYO): Dikhu adena Mokokchung aser Chare tsüngda ita ana atema gari senzüba ajak noktanger ta Mokokchung Deputy Commissioner, Thsuvise Phoji-i metetdaksüogo.

Iba highway nung Cement Treated Base (CTB) maparen

inyakba ajanga ano ita ana atema garitem senzükba noktanger ta pai ashi.

Mokokchung aser Chare tsüngda senzürtemi Sewak Gate-Moalenden-Meyilong-Chare lenmang ajanga senzütsü metetdaksür ta Mokokchung DC-iba ashi.

Manipur CM-i lisopurtem yimjung nung alitsü ayongzüker

Imphal, January 20, 2025 (Agencies): Manipur nung lisopur kin ajak yimjung nung alitsü aser kati ka angatetteptsü ayongzüker ta Chief Minister N. Biren Singh-i Hombarnü metetdaksü.

Manipur nung sorkari recognized asüba kin 35 tashi lir.

"Manipur nung tesüiba ita 20 tashi tensa mejungi arudang nisung 260 tema samaogo saka State sorkari kin shinga anema menokdaker" ta CM Biren-iba ashi.

Sorkari ozüng alema arurtem aser arrtsülen yimtsüng (unrecognized) aika akumba atema tebilemtsü abener, ta paisa ashi.

Manipur state ajungalen

renloktsü atema nübo teimba aliba kintemi nübo tajemba alirtem yaritsüla ta Biren-iba tayongzükerba agütsü.

"Asen state nung yimjung bener arutsü aser tensa süngjemtsü atema public külemi inyaksüla aser state renlokdahtsütsüla. Asen oboula nungeri tangar dang nungi asen tetsü tasoli kümsüka ayuba bilemtetsüla" ta pai ashi.

"Alemlü nungi lisopur kin balala külemi dang liyonga arur aser asen lima kümsüka ayur. Sorkari state nung yimjung bener arutsü merangba nung public-iba amalitepa yariteptsü mepishir" ta CM Biren Singh-iba metetdaksü.

CM Neiphiu Rio-i Konyak Heritage Site semdang



January 20, 2025 nü Konyak Heritage Site, Mon nung Chief Minister Neiphiu Rio-iba aniba telok aser tangartem külemi agiba noksa ka angur.

Dimapur, January 20, 2025 (TYO): Chief Minister Neiphiu Rio-iba January 20, 2025 nü Mon nung Konyak Heritage Site semdangogo.

Forests, Environment & Climate Change and Village Guard Minister CL John aser NDDP President Chingwang Konyak nati CM Rio meina ao.

"Shilem agirtem, ketdangsurtem, Civil Societies, ali kiburtem aser mapa inyakertemi Konyak Heritage Site iba jenjang tashi bener aruba

atema pelar. Loktiliba ka renloka aotsü atema telongjem aser amalitep kanga nungdaker" ta CM Rio-iba ashi.

Paisa nübertem dang heritage site maparen tembangtsü atema maneni amalitep alitsü aser kati ka yaritepa aotsü ayongzüker.

"Iba Heritage Site nung mapa shitak inyaksüla aser mapang shitak nung renemtsüla. Maneni Electricity aser water supply connectivity atema bangdak department temi mapa inyaksü nenshir" ta CM Rio-iba ashi.

Konyak Heritage Site maparen ya ita ana tsüngda renemtsü aser April 2025 mezüng hopta meta lapoktsü imlar ta paisa shisem.

Iba sentong nung Konyak Union President, Tingtok Konyak-iba tesentepertem pelaa agizük aser Konyak Heritage Management Community-iba o tatsüka jembü.

Mon Deputy Commissioner Ajit Kumar Verma, IAS-iba Chief Minister aser par teloki iba tesem arua semdangba atema pelaba metetdaksü.

Mokokchung DPDB senden menogo



Deputy Commissioner & Vice Chairman, DPDB Mokokchung, Thuvisie Phoji lenisüba kübok January 20, 2024 nü Deputy Commissioner, Mokokchung indang Conference Hall nung DPDB senden amendang tangokba noksa ka yangi angur.

Dimapur, Aenjeti/January 20 (TYO): Mokokchung District Planning & Development Board (DPDB) ita shia amenba January 2025 atema senden Deputy Commissioner, Mokokchung indang Conference Hall nung Deputy Commissioner & Vice Chairman Mokokchung DPDB, Thuvisie Phoji lenisüba kübok January 20, 2024 nü menogo.

Senden tenzüka menden-i Union Minister of State for Civil Aviation and Cooperation, Government of India ajanga Mokokchung district semdangtsü aliba indang

metetdaksü aser Longkhum yimdak 2nd Cherry Blossom Festival nung shilem agiba atema Department ajunga dang pelaba lemsatop aser iba benjong tuluba kumdaktsütsü mechi maneni shilem agitsü ayongzüka liasü.

Additional Deputy Commissioner Mokokchung, Chumlammo Humtso ajanga district nungi NPSC aser NSSB tatidang agütsütsüpur atema Free Coaching Class agütsüba mezüing batch takok ngua temogo ta metetdaksü aser taruba küm atema registration ya March ita tenzüksü ta metetdaksü, koba DPDB

ajanga agütsüir.

Senden nung Superintendent of Police, Mokokchung, Vesupra Kezo-i sorkar mapa inyaker kumzüka ayutsü atema 218 BNSS (CrPC) benokba indang board züngsemtem dang rateta ashi.

District Planning Officer, Chuba Phom-i Republic Day 2025 mapang Agri & Allied, Engineering Wing, District Administration aser danga Department temtsüingta Football exhibition match (Officers) aser Penalty Shootout (Lady Officers) asayatsü aliba indang metetdakja liasü.

Sebastian Zumvü-i media nung temelenshi adoktsü ayongzüük



Kohima, Aenjeti/January 20 (TYO): Osangbener nübu tejen aser tang Sovima Village Council nung chairman, Sebastian Zumvü-i osang abenba yimya melenshitsu nüngdak ta ashi aser YouTubers tali akumba aser akhi mapang nungi amshiba print media azünger ajema akumba indang tebilemstü lemsatopa liasü.

Hombarnü Kohima Press Club (KPC) indang 24 buba Foundation Day sentong nung jembidang, Zumvü-i akhi mapang internet mesüra mobile phones malidang KPC inyakyim bilemteta jembi aser tang media environment den medemdanga liasü, kong social media sapangtem aser YouTube ajanga osang tem azüingba melenshitsuögo.

"Tanübo paper nung madokdang osangtem nikongdang tashinung ajunga meteter alir aser ibaji online content creators temi osangtsüsang yangluba ajanga lir," ta pai ashi.

West nung ama Nagaland nunga print media ajema akumtsü aser digital sapang tem ang tali sabua akimtsü akok, ta pai ashi.

Iba temelenshi dak sendakba nung tayongzüka jenti lir aser YouTubers sabur ang tali akumtsü, saka digital content creators temi osangbener yima mamshir, ta ashi.

Iba dak sendakba nung YouTubers karbo

temulunglemtsü mali, anungji KPC ajanga Department of Information and Public Relations (IPR) den lungjemer media yimya shidak amshitsu atema guidelines mesüra özüing yanglutsüla, ta ashi.

"Nisung kar mobile phone aser camera lir ta sür parnokji osangbener masü," ta pai ashi aser kanga kera melenshia aoba media space nung mangdang talang ayutsü nüngdaker ta ashi.

Zumvü-i maneni KPC dang tang lenirtem kümsük ya Silver Jubilee tashi atsülanga iba benjongmung tiptema amungtsü ayongzüka liasü.

Sentong nung Kohima Press Club tir Alice Yhoshü-i jembidang, KPC nung print aser electronic media nungi züngsem 68 lir ta ashi aser züngsem aser lenir tejentem nem akhum agütsü aser parnok dak mangdang tajung aliba ajanga KPC tanü iba jenjang nung lir ta ashi.

Lai KPC building teti asoshi ka nüngdaker aser state sorkari iba atema New Secretariat area nung ali lazüksüba atema pelar ta ashi.

Chief Minister-i 2024 küm February ita ki yanglutsütsü sangdongba indang lai süoja jembi aser iba project ya aruya aliba fiscal year nung renloka aotsü imlar ta ashi.

24th Foundation Day ya KPC küm 25 ajungba tetenzükir lir, aser mongyonga aodang sentong balala

ayongzüksü lir aser yangji club indang official website densema lir, ta ashi, koba Zumvü-i iba sentong nung semzüksü.

Iba website ajanga club nükjindong, inyaksangshi temaba jenjangi ajungkettsü sapang agütsütsü, digital archive ka ama asütsü, ta lai ashi.

Lai züngsemtem dang Club indang motto "To Serve" nenshia ashi aser maneni ochi shia terenlok asoshi inyaktü ayongzüük.

KPC tenzüker aser PTI reporter Narayan Bahadur-ia iba sentong nung o tatsüka jembidang, 2001 küm iba anogo state yimtiba nung osangkaket balala nungi tezülur, adoktsür aser osangbener tem adenshia arok ajungtsü asoshi inyaktü tenzüük, ta ashi.

Yamaji liyonga arudang tensa balala nung KPC lungjemer nokdaka nüburtem nem tatalokba ajak metetdakja arur, ta pai ashi.

Akashvani Kohima nungi osang azüingba nung anisüngzüker alisang Jonas Yanthan aser founding member aser KPC advisor Kopelo Krome nungeria tajungshi o jembia liasü.

Iba sentong nung club indang küm tepiyong inyakba osang KPC tongti zülur Vishü Rita Krocha-i agütsü, tatong tir Asa Seyie-i melepzüing o jembi aser Seyiekietuo Keretsu-i temeja ken ka tena liasü.

Dimapur nung nisung tasümgang ka nguteta lir

Dimapur, Aenjeti/January 20 (TYO): Railway siding area nung nisung tasümgang ka nguteta lir ta January 19, 2025 nü Station Manager, NF Railway Dimapur nungi tezüluba ka Dimapur Police dangi yoka liasü.

Iba osang nung ajemdaker duty nung alirtem iba tesem bushia ao aser yangji mejangjaba non-Naga tebur ka (arishi küm 26 shi tain) tasümgang ngutet, ta Dimapur Police sangdong ka ajanga ashi.

Iba nisungba ya shiranga aser yasa-tzüraba ajanga asü südi ta temulung melemteti lir.

Ozüing agi melaba maparen ajak renemba sülen tasümgang ya PM examination aser jangjatsü atema District Hospital Dimapur morgue nung yua lir, ta ashi.

Nisungba ya jean long pant sentüsü tanen, jacket sentüsü tanak, t-shirt sentüsü temesüing sema liasü. Pa tereprangtsü sentüsü tamang aser kou talang.

Kibur/kinunger/tembar temi Officer-in-Charge, Govt. Railway Police Station, Dimapur den Mobile No. 7085055021 ajanga tongteprateptsü akok, ta Dimapur Police sangdong ajangasa ashi.

DHD nung Radio Diagnostic Centre semzüökogo

Dimapur, Aenjeti/January 20 (TYO): Tikvah Healthcare Private Limited (THPL) ajanga Department of Health & Family Welfare, Government of Nagaland den lungjemer state of the art Radio Diagnostic Centre ka District Hospital Dimapur nung semzüökogo.

Iba project ya Public-Private Partnership (PPP) model nung amenok, koba ajanga region nung diagnostic healthcare tajungba kuma melenshitsu nükjindong lir.

Iba Centre ajanga danga private hospital tem dang jenjang 20-40 agi tajemba nung tashidak putettsü, kong dangalen anguba ama quality tajung alitsü.

Ibai nüburtem asoshi tepelatsü osang tajung ka lir, kong CMHIS aser Ayushman Bharat scheme kübok teyari agitettsü, anungji makamaiter nema healthcare shidak agütsütsü.

Iba Centre nungya tashidak balala putetba hadir tasen, advanced CT scan systems, ultrasound devices aser digital X-rays lir, anungji radiation ajema tashidak shidak putettsü.

Item oset ya GR, Samsung

aser Siemens nungi technology tejangja aser tajung amshia yanglu, anungji tashidak shidak putettsü noksa tem tzü ama müreker alitsü.

Mapang ajak nung iba service ya takotet nisung temi agütsütsü, kong in-house radiologist aliba ajanga diagnostic results junga meyipzüka aibelen ajemtsü aser mapang shidak nung temang anepalu sütettsü.

Centre ya 24/7 emergency services lir aser THPL ajanga taruba noklen nung MRI technology benoktsü sentong lir, koba ajanga Centre indang tashi ulushitsü.

Ibaji bendenlokba ajanga Dimapur nung advanced diagnostics nüburtemi jenjang talangba nung amshitettsü.

Iba Centre ya healthcare facility kisüing masü saka community resource lir, koba ajanga nüburtem nem healthcare tajungba agütsütsü.

Iba Centre ya Hombarnü nungi Honibarnü tashi anepdang 8:00 ako nungi nikongdang 4:00 ako tashi lapoktsü aser Emergency Services yabo 24/7 angutsü.

January 2025 atema Tuensang DPDB senden amen

Dimapur, Aenjeti/January 20 (TYO): Ita shia amenba Tuensang District Planning & Development Board (DPDB) pur January 2025 atema senden Deputy Commissioner, Tuensang indang Conference Hall nung January 20, 2025 nü Deputy Commissioner & Vice Chairman, DPDB Tuensang, Lithrongla Tongpi Rutsa lenisüba kübok mena liasü.

Taoba senden nung lemteta alibatem lepa repringshiba sülen

Tuensang Town nung Republic Day 2025 atema mapa alemtsü aser logistic arrangements indang jembia liasü.

Menden ajanga board züngsemtem dang district nung TB agi shiranger nem chiyongtsü alitsütsü atema senotsü bendentsü indang nenshia metetdaksü.

DC Tuensang-isa Head of Department tem dang pei posting tesem nung alitsü aser nübur tenzüka mapa shidak inyaktü ayongzüük.



Nagaland ki hoise ta sür ken ka Tali Imdonger-i mejemba tanü Majakong ward nung Ethnic Performing Arts Director Ikato Y Kiho-i sayatsüögo. Tali Imdonger ya ken mejemba aser kentener nübu tajung ka lir, pai mejema atenba ken aikati nubur temi kanga sapua aliba ngua arudar. Tanü sayaba ken ya nuburtemi anganüa lira YouTube nung angutsü.



January 20, 2025 nü New Delhi nung NCC Republic Day Parade 2025 nung Defence Minister-i Cadets nem certificates agütsüdang tangokba noksa nung angur.

Sanjay Roy taküm piyong jail nung puoktsü

Kolkata, Aenjeti/January 20 (Agencies): Yaküm RG Kar Hospital nung junior doctor ka tashiyim amshia raksatsüba sülen tepsetba ken o nung Hombarnü Kolkata nung aliba Sealdah Court-i Sanjay Roy taküm piyong tepuokdak ayutsü obendang agütsüogo.

Court-isa West Bengal state sorkar dang asür kibong nem sen lakh 17 agüjang, ta tuyu.

Honibarnü iba ken o nung Sealdah Court-i Sanjay Roy aija liasü. Bharatiya Nyaya Sanhita (BNS) kübok Sections 64, 66 aser 103(1) nung ajemdaker Roy aitsü.

Yaküm August 9 nü arrshi küm 31 doctor tasü mang anguba sülen anogo ka dang lirbo iba hospital nung civic volunteer, Roy pua liasü.

Hombarnü ken o angadanga mapang nung Roy-i, pa nem tiyazü nung tai

tongloktsür, kechiyong pai aibelena mali, ta ashi. "Tai tonglokja aliba ajakji tiyazü. Ni aibelena mali. O jembitsü atema kü nem temelaba magütsü. Ni reshikangshiogo aser kü dak zükogo," ta pai ashi.

Pa anema ken o jembirtemibo, "Roy nem tasüba temerenshi obendang agütsüsüla, kechiyong iba ama tatalokba ya khenyongi balaka lir. Shirangertem yaritsü atema doctor ji sorkar hospital nungji liasü. Iba ama tatalokba ya khenyongi balaka lir," ta ashi.

Ajisüaka Judge Das-i, iba tatalokba ya "rarest of the rare" category masü, anungji tasüba temerenshi obendang agütsüsüsa masü, ta ashi.

West Bengal Chief Minister, Mamata Banerjee-ia iba ken o nung aibelensang, Roy nem tasüba temerenshi agütsüsüla,

ta takhangba agüja liasü. "Obendang masütsüdangyongi pa nem tasüba temerenshi agütsüsü atema ni ajungshia liasü. Onoki kecha ashitsü makok, saka onoki tasüba temerenshi agütsüdahtsüner," ta Mamata-i metetdakja liasü.

Bharatiya Nyaya Sanhita (BNS) kübok Section 64 (tashiyim amshia raksatsüba) nung aibelenertem ishiba agia küm 10 tepuokdak ayutsü aser taküm piyong tepuokdak ayutsü akok. Section 66 kübok aibelener (yirutsüba ajanga asüba mesüra taküm lemtatsüba) ishiba agia küm 20 tepuokdak ayutsü mesüra taküm piyong tepuokdak ayutsü akok.

BNS kübok Section 103(1) (tepsetba) nung aibelener nem tasüba temerenshi agütsüsüa akok mesüra taküm piyong tepuokdak ayutsü akok.

Uttarakhand nung cabinet-i UCC manual agizükogo

New Delhi, Aenjeti/January 20 (Agencies): Hombarnü Uttarakhand state nung chief minister Pushkar Singh Dhama leniba nung cabinet senden amendang cabinet-i Uniform Civil Code (UCC) manual agizükogo.

Legislative department-i iba manual jungjunga reprangshiba sülen cabinet-i iba manual agizüker.

Senden tembangba sülen osangbenertem den jembidang Chief Minister, Pushkar Singh Dhama-i, par sorkari election mapang tenangzükbatem inyaksü, ta ashi.

"2022 küm Uttarakhand

nung nüburtem dang onoki sorkar akümba sülen UCC Bill benoktsü ta nangzüka liasü. Onoki iba tenangzükbaji inyakogo. Iba bill draft renema agizük, Tiri agizük aser iba ya ozüng kümogo. Iba dak sendakba training maparen tatembanglen kati arudar. Ajak jungjunga asadanga sülen kobi melii iba ozüng benoktsü atema onoki sangdong agütsüsü," ta chief minister-isa metetdaksü.

Yaküm February 6 nü Uttarakhand legislative assembly nung sorkari iba bill benoka liasü, aser tasüngnü iba bill agizük.

Iba sülen March 13 nü linük

Tir, Droupadi Murmu-ia iba bill agizükba sülen linük nung mezüng UCC bill agizükba state ji Uttarakhand aküm.

Uniform Civil Code kübok senso ajak atema ozüngtem kasa dang asütsü.

Union sorkaria iba ama ozüng ya linük tesem ajaklen benoktsü tebilemba lir. BJP-i yimsüsüba states Gujarat aser Assam-ia peipei state nung UCC agizüksü atema inyakdar.

2022 küm Uttarakhand nung assembly election atema nüboyimba mapang nung BJP-i state nüburtem dang parnoki takok ngura UCC Bill agizüksü, ta nangzüka liasü.



January 20, 2025 nü New Delhi nung Gandhi Nagar constituency nungi AAP candidate, Naveen Choudhary aser Punjab Chief Minister, Bhagwant Mann nati election atema nüboyimdang tangokba noksa nung angur.



Office of the **AO RIJU**
MOKOKCHUNG : NAGALAND - 798601
"Kenozülu Yinsem"

Ref.No. AR/SD/2024/14

Date: 20-01-2025

SANGDONGER

- 2024 küm Yimpoksüi (November) 28, anogo, Ao Senden Mendenti ajanga sangdongba ama, taküm (2025) nungi Mokokchung District kübok Govt. aser Private School ajak nung Ao sayutsü aser taoba mapang, Tsüklai 17, 2012, Ao Yimkong Mungdang nung Aotsür Aor ajak kangtepa Ao subject agütsü lemteta aliba mapa küma aotsü atema, School ajaki 2025 nungi Ao sayutsü Tesayur renema alitsü ta amanger. Anungji iba telemtetba takok ngua inyaktettsü nükjidong nung, Aenjeti (January) 29, 2025 anogo, Class 9-12 nung Ao sayutsüpur ajak (Kohima aser Dimapur nung alirtem dena), Ao Oshi angazükshiyim den ano Ao Oshi dak sentakba nungdak balala aika lemsatepba sentong ka, Anepdang 10 ako nungi tenzüka Ao Senden Conference Hall nung akatsü. Iba sentong ya kanga tongtibang asünung, marur School-tem dang tasüngdangba alitsü.
- Ao Rujui achayanga agiba Arangtet Tatidang Aenjeti 22-24, 2025 anogo Kohima aser Mokokchung tesem ana nung anepdang 10 ako nungi tenzüka agütsü. Admit Card Kohima nung agütsüsüpur tatidang metenzükdang Gondha ka jelia tatidang hall kima nungi angütsü. Mokokchung nung agütsüsüpur Aenjeti 21, 2025 anogo office mapang nung angütsü. Tatidang agütsü tesem:

Mkg, Model Hr. Sec. School, Arkong Ward
Kma. KABA Chandmari, Fellowship, SS Hall

(S. Wati Ozüküm)
Tongti Zülur

Telangana nungi kaketshir ka khaset



Hyderabad, January 20

(Agencies): US nung Telangana state nungi kaketshir ka mejangjaba nisungtemi khasetogo, ta Hombarnü par kinüngertemi metetdaksü.

Arrshi küm 26, K Ravi Teja 2022 küm US-i oa azüng aser ita 8 tejaklen pa MS course renema sülen mapa tebushidak liasü. Par kibong züngsemtemi sorkar dang tasü mangji tekaraba nung bener arutsü atema inyakdaksüner, ta mepishio.

Osangbenertem den jembidang tebei, "Ozü jabaso khasetogo ta kü nem metetdaksü. Ni sorkar dang tekeraba nung tasü mangji bener arujang ta mepishir. Ni iba dak alaka kecha jembitsü makoker," ta ashi.

Tawa Teja-i tebu dang, US nung pa mapa anguba sülen kidangi meyipa arutsü, ta shir liasü.

Teja ya Hyderabad yimti kübok RK Puram Green Hills Colony nungi liasü. Hombarnü pa Washington D.C nung aliba petrol pump ka nung lia mejangjaba nisung kari pa khaset.

Police-i iba tatalokba bushisüngdangdar aser aibelenertem jangjatsü merangdar, ta ketdangsertemi metetdaksüogo.

Yaküm November ita nunga US kübok Chicago yimti nung Telangana nungi arrshi küm 22 lanur ka khaseta liasü. Sai Teja Nukarapu ji tezüngdak liasü aser petrol pump ka nung 'part time' inyaker ka liasü.



TIR YIMYIM YIMOBILEM (EDITORIAL)

DIMAPUR SANGTENNÜ, JANUARY (AENJETI) 21, 2025

Gaza nung shirnoki yimsü asütsü ?

Palestine kübok Gaza nung Hamas teloki yimsü asüba mapang 2023 kum October 7 nü ajungbena ka dang Israel lima tesem ka nung kenten benjong tuluka lia alidang, Hamas teloki Israel lima amak. Iba mapang Hamas teloki Israel nunger 1195 tepset aser tetsür tanur dena nisung 251 pua bener ao. Iba sülen anogo 20 sülenbo Israel nungertemi October 27 nü Gaza yimti ajunga agia adok. Aji oda, Israel nungertemi Hamas telok anema mangyangba rara nung taoba ita 15 tsüngda Palestine nunger meyrirjang tenem dak tali tepsetogo aser talidaka maka aser shiranger anepaludaka maka den ayatzüra aser tashidak agi nisung meyrirjang neter shi süogo aser nisung lakh dak tali yirua lir. Ibaji dang masü saka Israel nungertemi tejashi nung Gaza nung yimti tapu balala makyonga aodang yimti agi auyi kümstüogo aser Palestine nunger lu dena raksatsüogo. Ano, Hamas telok asoshi takoksa tulutibaji parnokoki ashikülaka Israel amakba taa Israel nungertemi Hamas nung tongti lenirtem aika tepsetogo. Atangji, akhidang nungi asenokia Palestine o Israel na raraba otsü Laishiba nung David aser Goliath na otsü nungi angazüka lir, anungji asenok asoshi Israel o Palestine na lushi indang ka pusema aser ka anema ta jembitsübaji meshitak asütsü. Aji parnok nem yutsüdi. Ajisüaka, Palestine nungertema Palestine limaji par lima aser Israel nungertema Israel-ji par lima ta ser tangatetep nung alitsübajiang kanga tongtibang lir. Iba tangtetba nungji UN-ia kin ana tsüngda yimjung yanglutsütsü meranger. Palestine nunger asoshi tia majung, parnoka yimten telok ana kümer meputepteter, anungji 2007 kum nungibo Palestine lima agi ana kümer Gaza nung Hamas aser West Bank Fatah teloki yimsü asür. Aji oda, yimten nung pei temeten aser tebilemba ajak metongtetaka, Fatah telok amato yimjung nung alitsüang merang nungbo tang Hamas teloki ajuruba takoksa aser timtema majurula aser Gaza nung yimtitem agi anak-ayui mekümla. Pei yimten temeten indang mebilemdangi tangar den tsükchir ayimjang, asenibo tangar meyrirjang ka dang tepset saka tangaribo asen nübör meyi noklang ka tepseter külenang asen lima tagi majung raksadaksütsüsa atongtetbaji tamashi maka tuluka asütsü. Atangji, koba lima nung südir süang, alima nung rarajia teti asoshi masü aser yimjunga teti asoshibo masütsüa akok, anungji Hamas teloki Israel amakba sülen ita 15 tashi Israel nungertemi Hamas telok aliba tesemtem bushia makyonga aoba sülen, tang parnok tsüngda yimjung lapoka puoka alirtem melentep tenzükbaji alima asoshi osang tajung ka lir. Aji oda, Hamas teloki October 7, 2023 nü Israel amakba sülenbo, Hamas o Israel na rara masü saka Israel-i Hamas amaker amaidang makdokyonga ao, anungji nisung kolak azüngba nunga aser rongsen jenjang asadanga nunga Israel nungertem dang nungibo Hamas telokang noklangben agi takoksa nguogo aser timtatamba timogo. Iba denji medemdanga, Hamas telok purtema alima tsüngdang terabo nümadangtetsüsa yakanü mezüng parnok tsüngda tepuokertem melentepba sentong nung Hamas telokibo Israel nunger puoka alirtem asem dang chiok saka Israel nungertemibo Palestine nunger puoka alirtem 90 chiok, anungji Israel nunger nisung ka shia Palestine nungerbo nisung 30 chiokogo. Iba amaji Hamas o Israel na tsüngda puoka alirtem mechiokma tashi aser parnok tsüngda yimjung ali tashi chiokpet chioka melentepstü. Ajisüaka, Hamas asoshibo tebilemstü tulutibaji, Gaza nung ano parnokisa yimsü sütettsü asü mesütettsü (?) ta asüba tebilemstüji asütsü. Iba yimten onük nungji Israel nunger tebang ira, ashiko, Hamas teloki Gaza nung yimsü asütsüsa yimten tashi sadema magitetsüa akok. Hamas asoshi tebilemstüji, parnok tongti lenir aika süogo aser par yimtitem to agi anak-ayui küma lir, itemjia Israel teyari magiang meyanglushitetsü.

OLEMSABANG

ASTD-i AROGO YIMDEN NUNG KECHIBA TEKAAMOKER?

- Wati Longchar

ASTD-i DABA arogo dangi January 6, 2025 nung "ASTD telemba" yokba shiti dak ajemdaker YSS nung Baptist distinctive "Arogo aser Yimden" na tepila aser tesendaktep nung sensaksem agia shisatsu lemsatop. Kari ASTD-i tim masu inyaker, kari asen sasa asen kechi amanger memetetba tia sayur, kari yimden kubok arogo ayutsu merangbaji khuret tulu, kari ASTD yimden lenirtemji arogo balala nungi alitsu anungji tanga arogo zungsem kati yimden tashi amer arogo ka nung tashi amshibaji asenok Baptist distinctive tesayuba den mapet. Anungji ya arogo ka temeden anema lir. Tenzukertemi aibelena lira pei juri arogo zungsemtemi telemtet agitsuba dak alaka, tanga telok kati amokmerena inyaktsubaji tim masu, kari ola adokbaji tim dang saka ASTD ajanga arubajibo lokti mashilen ka nungi arur. DABA nung zungsem or DABA general nungi ken-oji arutsula, ano kari ASTD nung alirtemji "as DABA member arur sura, shitak saka banner/organization tenung balaka under nung arubajibo protocol tai. Unless ASTD is a stakeholder under/or with DABA" ta tebilemba balala lemsatop.

Ano karibo arogoi aibelena inyaker nungji ASTD-i kechi inyaker aji tim. Arogo inyakyim nung teinyakertemi aibelenba agi nung nung nurburtemi maremetet ola adoker ta angatetsula ta shisem, kari arogo nung Deacon Board lir, anungji Board nung iba onuk ya jung junga jembir, kechi lemtekdir aji bener Deacontem ajanga shir ajurutsu mesura tongteptsu tim ajurua inyaker nung ajungtsu, kari iba ya nurburtemi tim ola adoker. Amangbapurtemi bendentsu aser nisung kari achitsu, iba sülen taidok agutsur ta asuba yagi memelenshir. Anungji teloki lemtekdir ama inyaktsubaji tim dang. Iba ya tera mashilen ka meyipshi nungbo DABA tarutsu nukla kangabo majungtsu ta tarendak tebilemba lemsatop.

Ano sabangpur aikati iba teyanglushitsu (reformation) adoktsu mapang ka, arogo Lai tesayuba dangi meyiptsu mapang ka, karibo "Clergy church nungi believers (congregational) church dangi meyiptsu mapang", kari ya ajemalushir kumdanga inyaktsubaji tayongzukba ama agitsula, kari iba tatalokba ajanga asenok temulung meyiapa Yisuji asen kibur ta agizuka asen tashi, temulung, tokolok aser tanela ajak agi Pa tenzukdi aser santem tenung dena meteta anepaludi aser nemzua aliba tebusii onutsusa tanela khuret bendi, aser kari arogo ya Laishiba nung amendak aser iba tesayuba arogo asoshi tatembang tashi lir. Arogoi iba nungi pilara, arogo ya alima lokti jana nangdendak akumtsu aser arogoi Tsungrem Oi kechi ashir ta tasu ita nokdaksu melena distinctive mesura nisung tiembai mulungbaji tatembang tashi kumdaktsuba ajanga ta ajemalua agizukdi ta ajungshitep.

ASTD-i arogo yimden nung amokba tim masu ta ashishiteperdangashi, nurburtemi arogo inyakyim nung temelenshi aginer ta asuba ola ta angatetsula. We should discern the truth of what people are writing on the wall. Justify aser counter-argument dang magutsui asenok Tsungrem tenzucker pei tai aser tashi mait bushitsuba, shitetsuba mapang ka. Social media nung mapang mapang nung arogo aser tenzucker anema prokshiba ajakji shitak ta mashir, saka itemji nurburtemi temulung masuba, melenshiang, ta ashiba ola ta metettsula. Arogo general meeting nung nurburtemi tenzucker den direct confrontation "anenang", "auer" ta tashi ashiba lir nung koda. Item ajak ya asen tenzukba mapa agi tzura matemba ola ta angatetdi. Asenok melenshiang ta ashiba ola ta positive sua agitsu nungdak.

Asenok ajaki metettsuba kaji Baptist distinctive ta asuba ya fixed doctrine or practice ka masu ta metettsula. Putu balala nung aser alinuk balala nung pei nubur dak apet melenshia benshir. Tat. agi, arogo kar nungbo Baptist-a Bishop lir nung koda. Baptist arogo karibo presbyterian administrative structure amshir. Baptist distinctive amer arogo rajang kumdaktsura ajiang tai. Lenir kari ashi ama, Baptist distinctive is not superior to Jesus' teaching. Ochimashi tenzucker metongshitsuba, merenshiba, anentsuba ajakji Baptist distinctive lir. Kechiba sura Baptist tamanger telok ya ochi nung noktaksu aser kuli asutsu ta tasu ita jatetba telok ka lir.

Ao arogo nung poklang tenzucker "burn out", "stagnant" aser mapa tasen/Lai ratet tanu putu den peta mesayutetbaji we are fixed in one place without further study. Tenzucker kaji jaka balala nung urban, rural balala tatzuk-talem metetba, national, international exposure, tali bushiloktsu asoshi study/training balalai yokba ajanga renloker. Tenzucker ka shistsu angazuklokshitsu lemang lapoktsubaji na/arogopur tajangzuk asoshi ta arogoi metettsula. Teinyakdak nung mapang shia ita ka ana mesura kum piyong shisa angzuklokba ya tenzucker ajak compulsory mapa ka kumdaktsutsula.

Iba den tenzucker jaka melenshia tenzukba janga shisatsu nung ainer ta metettsula. Iba tangatetba ajanga India aser tanga foreign lima arogo aika nung kum asem shia, arogo kar nung kum pongu shia transfer suteper. Hau, ibai ajanga tenzucker kibong nung mepetmesu aika adoktsu, saka arogo yinti tajangzuk apir inyaktsubaji mapang tongogo. Employee-i mulungba jaka nung masu saka employeri mulungba jaka nung tenzucker kaji tenzuktsula. Tetezu, deacon aser amangbapur olaji tongtibangba. Ibai talok ngua bener aotsu asoshi Mungdangi appointment achaayangtsula, transfer system yanglutsula, tanur education atema boarding school tajung lapoktsutsula, aser allowance teperi agutsutsula. Mungdang teka aitsu mapang tajung ka. Ya lim arogo nung tenzucker dang masu, Mungdang nung tenzuckeria mulungtsula.

Lim arogo nung rongsen ketdangsuba ya meyiapa repringshitsula ta nurburtemi ola adoker. Transparent mali, pei pei kushi kushi inyaktepba aika ajangashia arur. Ano towntem arogotem nung rongsen tali aser yimtsung arogo nung toklang tenzucker underpaid (living in poverty) - Equitable distribution of wealth mali, ya melenshitsu nungdak ta ola adoker. ASTD-i zuluba aser nurburtemi ola adokba ya tongtibang ta angatetba arogo aser Mungdang inyakyim nung reformation adoktsutsu ola maneni adokdi aser mera tasen agi ta ayongzucker.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Pastor Lorenzo jail nungi chiokogo



Pastor Lorenzo Rosales Fajardo aser pa kinüngtsü na noksa nung angur.

January 20, 2025: 2021 küm Cuba nung sorkar anema longkak aitba nung shilem agiba atema pastor, Lorenzo Rosales Fajardo aija küm 8 tepuokdak ayutsü obendang agüja liasü, ajisüaka ketdangsertemi pa jail nungi chiokogo.

US sorkari kiralongra pusemba linüktem list nungi Cuba agienba sülen Cuba ketdangsertemi jail nung puoka alir aika chiok.

Hokolbarnü (January 17) Mar Verde jail nungi pastor Rosales Fajardo chiokogo, ta Khristan melungtet telok Christian Solidarity Worldwide (CSW)-i metetdaksü.

Cuba sorkari jail nungi nisung 553 chiok, aser parnok rongnung Afro-Cuban Yoruba yimsü lenir, Donaida Pérez Paseiro-a densema liasü. Pérez

Paseiro kinüngbu, Yoruba lenir Loreto Hernández García bo mechiok.

Kiralongra yariba linüktem 'list' nungi Cuba agientsü, ta US-i sangdongba sülen Cuba-i tepuokdak alir aika chiok.

2021 küm July 11 nü Pastor Rosales Fajardo den tangar aika Palma Soriano nung pua liasü.

Yaküm June ita nung International Religious Freedom or Belief Alliance-i, "Ketdangsertemi pa dak azük aser kanga mezüngmeshia liasü," ta metetdaksü.

2021 küm December ita nung pastor Rosales anema ken o angadang. Pai ozüing alema inyaksü atema lokti ajungmeso aser tensa raksadaksütsüsa inyak, ta pa nem tai tonglokja liasü.

2021 küm Cuba nung

nüburtemi coronavirus wara mapang nung chiyungtsü aser moziü agi anüingba atema sorkar anema longkak sashia aita liasü. Iba mapang nungji sorkar ketdangsertemi longkak aiterem aika pua jail nung puok.

Pastor Rosales mezüng Boniato Maximum Security Prison nung puoka liasü. 2023 küm tetenzüklen par kinüngertemi pa lower-security facility kati belena puokogo, ta metetdaksü.

Pai jail nung külem puoka alirtem den Khrista osangtajung lemsatepba agi pa "punishment cell" ka nung puoka liasü.

Pa anema ken o angadangba mapang nung kuli ashitsü atema prosecutors nem dang temelaba agütsü, iba denji külemi police-ia pa anema kuli agüja liasü.

CSW Director of Advocacy, Anna Lee Stangl-i, pastor Rosales aser Yoruba lenir Donaida na jail nung aliba mapang nung tena kanga reshikangshia liasü, ta ashi.

"Onoki Cuba sorkar dang tangsa Loreto Hernández García chiochtsü aser Pastor Rosales Fajardo den yimtenren tsütsü puoka alirtem ajak chiochtsü akhanger," ta tamalen Strangl-i takhangba agüja liasü.

Pakistan nung Khristan ka jail nungi chiok

January 20, 2025: Pakistan nung Khristan tetsür kati Tsüngrem mezüngmeshi, ta aija jail nung puoka liasü, ajisüaka taoba Brihostibarnü la bail nung chiokogo.

Gojra Additional Sessions Judge, Waseem Mubarak-i arrshi küm 50, Shazia Younis nem bail agütsü. La ya tanur asem tetsü lir.

Pakistan nung Tsüngrem mezüngmeshiba ozüing kübok la aitsü.

La atema ken o jembitsür, attorney Javed Sahotra-i, "La nem tiyazü nung tai tongloktsü, ta ni ashiba ken oji judge-i agizük," ta metetdaksü.

"La nem tai tongloktsüsangia, Younis-i memeteti jana paper den külemi Quran kaket nungi tapak kar densema mi nung arong ta shiogo. Anungji Section 295-B kübok lai aibelen masü," ta Sahotra-i metetdaksü.

Ano la nem tai tongloktsüsang, mosque nung lenir jagi iba tatalokba indang tenük kuli magütsütet, iba denji külemi police-ia la ket nungi tashishitsü kaket kecha mangu, ta paisa ashi.

Sahotra-i, "Court nungi tezüluba nung obendang anguba sülen anogo ananü tsüngda Younis jail nungi chiochtsü. Iba sülen ni iba ken o ya agienadokang ta mepishia shidi ka agütsütsü," ta metetdaksü.

Pakistan nung Punjab

ANO GO ABEN TSÜNGREM DEN

AJEMALUANG

Aser techir süaka, pa timtem tushi anguba agi tashi angatsü angazük.

Ibri 5:8

Ajemalua aliba takümüji lapi masü, raratepa aliba jaki Tsüngrem oibo yamaiang shia lir. Tashi angabaji san kecha balaka tajungba mekümdaktsür. Laishiba jaki topong temu dang nungi tajungba. Tetezü tashi angabaji ajemaluba nungi adokdaksür. Aji oda Yisu Khristai meimchir dang mezüng tashi angatsü sayuogo.

Alima nung timtem, shisabulu, khuret balala majangshiba aser mebendangba shinga malitsü. Shisa makari item anogo nung nisung aser Tsüngrem süngdang aibelener aser takümüji mezüng jenjang dang nungi tamajungba akümer. Saka shisa akartemi Tsüngrem nungi yimlibilem aser taochi angutsüsa ajemalua kümteter.

Ajemaluba nung Tsüngremer temoatsü lir. Tsüngremer temoatsü agi kodanga anüngakonga metoktsür, matoksa meperi malir, aser kodanga mak mesüdaksür, shisa bulua melidaksür.

Temeim adianutem, ajemaluba agi shinga dena tsükchi medendaktsür, shinga makoksadaktsür mesüra shinga nema mezüngmeshi mesüdaksür. Maparen ajak nung Yisui sayuba ama ajemalua alitsü angazükdi. Pai pa dak amanger shia dak nungi yamaji ajemalua alitsü yimlar.)

Colombia nung Khristantemi lenirtem atema security meshir

January 20, 2025: Tan ita January 8 nü Columbia nung Protestant Khristan lenir ka tepsetba sülen Khristantemi Colombia sorkar dang 2023 küm security dak sendakba ozüing ka agizüka alibaji yanglushitsü aser yimsü lenirtem nem security agüjang ta takhangba agütsü.

Iba ozüing kübok yimsü lenirtem nem security agüja aliba agiena liasü.

Arogo ka nung lenir aser sayutsüing arrshi küm 28, Iván García den lar jala ka densema nisung trok People of God Christian Vision Church nung tekülem sentong ka nung adenba sülen meyipa aoba mapang nung motorcycle nung nisung ana arur pa dak injang khalokja liasü. Ivan Garcia kinüngtsü, Karen Nierles iba Arogo nungji pastor inyaker.

García dak injang agi trokben khashi. Iba sülen pa dak injang khaloktsürtemji jena ao.

Pastor Nierles-i, Garital yimdak New Rebirth in Christ Church nung la kinüngbui tongti shilem agiba ajanga iba Arogo kanga ain, ta metetdaksü.

Khristan melungtet telok Christian Solidarity Worldwide (CSW) den jembidang Pastor Nierles-i, García ya ozüing

alema inyakba telok ka nung liasü, saka pai iba telokji toktsür Khristan yimsü dangi tanaben meyipa liasü, ta metetdaksü.

Pastor Nierles-i, "Anogo ishika tejaklen pai kü dang pai Laishiba sayutsü atema kecha metsübur, kechiyong pa taküm tasen lenmang nung jajar ta ashi," ta metetdaksü.

CSW Director of Advocacy, Anna Lee Stangl-i, tesüiba hopta ana tsüngda northerrn Columbia nung tang agi tanabenbuba Protestant Khristan lenirtem anema inyaker, ta ashi.

Laisa, "CSW-i Iván García'er kibong aser lar Arogo nung züngsemtem den mangyim jashi lemsateper," ta metetdaksü.

Stangl-i, December 29, 2024 nüa prangpong amer kari Pastor Marlon Lora, pa kinüngtsü Yurlay Rincon, jabaso Santiago aser jala Ángela nunger dak injang khaloktsü, ta metetdaksü.

Pastor, pa kinüngtsü aser jala iba tesem nungjisa asü aser jabaso Santiago mejungi yirur hospital nung amongdang asü.

Stangl-i, "Protestant pastor ana kasetba kuli ya jungjunga bushisüngdangtsüla aser aibelenertem nem temerenshi agütsütsüla," ta takhangba agütsü.



Shazia Younis-i lar semchir ka ajunger tangokba noksa nung angur.

Province kübok Toba Tek Singh

District nung police-i December 21, 2024 nü Younis pua liasü.

Pakistan nung Tsüngrem mezüngmeshiba ozüing kübok Khristantem nem tai tonglokja jail nung puokba mesüra loktii azükba mesüra tepsetba tatalokba aika lir.

Pakistan Penal Code kübok talisa Arrla 295 aser Arrla 298 nung tasüba temerenshi densema temerenshi tulu agütsütsü densema lir, aser ibaji ajanga Khristantem densema yimsü tsütsü nütsüing kanga ajema alirtem takoksa angur.

Committee-isa Pakistan dang

Tsüngrem mezüngmeshiba ozüing kübok tai tonglokja alirtem anema tekaraba nung ochishia ken o akatsü mepishia metetdaksü.

Pakistan nung Tsüngrem mezüngmeshiba ozüing kübok Khristantem densema minorities nem tai tonglokja jail nung puokba mesüra loktii azükba mesüra tepsetba tatalokba aika lir.

Pakistan Penal Code kübok talisa Arrla 295 aser Arrla 298 nung tasüba temerenshi densema temerenshi tulu agütsütsü densema lir, aser ibaji ajanga Khristantem densema yimsü tsütsü nütsüing kanga ajema alirtem takoksa angur.

America nunger küm pezü ajema akumba atemtsü: Donald Trump



Washington, Aenjeti/January 20 (Agencies): United States tir inyaksü shima alisang Donald Trump-i Washington, DC nung pre-inauguration rally ka nung jembidang America nunger küm pezü ajema tembangdaksütsü nangzük. "Asenoki America nunger puti otsü nung tajungtiba mezüng anogo, tajungtiba mezüng hopta aser tajungtiba mezüng anogo 100 agütsütsü," ta Deobarnü Capital One Arena nung menden 20,000 aliba stadium sünga adenshia aliba "Make America Great Again (MAGA) Victory Rally" nung Trump-i ashi.

nung America nunger küm pezü ajema aruba shibangtsü aser America nunger tashi aser yimchiyimjung, akhum aser nüma tangtetba anogo tasen tenzüksü. Teti atema asenoki Washington nung tamakok ajurua aliba aser ochimashi political establishment tembangdaksütsü," ta pai ashi. Arishi küm 78 tain Trump ya 47 buba US tir ka ama Hombarnü 17:00 GMT ako (India nungbo aonung 10:30 ako asütsü) nung tenangzüktep agütsü. Tzüngsang kanga mokongba ajanga sentong ya Capitol building telung nung agütsü. MAGA rally nung Trump-i America nunger tashi aser yimchiyimjung indang anogo

tasen ka tenzüka US-Mexico arütsü nung illegal immigrant apütsü, totzü atsüba temaba jenjangi ajungkettsü, federal workforce tenzüksü aser sentong tebenja balala samadaksütsü ta ashi.

"Asüng anü aiba mapang tashinung asen linük amakba anentsü," ta pai ashi.

2021 küm January 6 nü jembiba sülen Washington, DC nung sentong tulu nung jembiba ibai mezüng alitsü. Pai January 6, 2021 nü iba o jembiba sülen pa bhukumer temi US Capitol telungi nungboka ai. Iba dak sendakba nung nisung 1,500 dak tema aija alir aika nem pai tatok agütsütsü nangzükogo.

Pai Biden administration ajanga tamachi executive order agüja aliba ajak tir kumer ghonda ishika tsüngta agientsü nangzük. Pai Hombarnü executive mapa 200 dak tema inyaksü ta osangtem ajanga ashir.

Paisa 1960s mapang tejangja nisungtem tepsetba indang files temai adoktsütsü ta ashi, kong tir John F. Kennedy, tenu Bobby Kennedy aser Martin Luther King Jr nungertem dena lir.

Israel nunger tepuokdak nungi Palestine nunger 90 chiokogo

Ramallah, Aenjeti/January 20 (Agencies): Israel nunger tepuokdak nungi chiokba Palestine nunger nisung 90 ya occupied West Bank nung pei kidangi meyipa shilangba mapang kinunger, tembar aser bhukumer telok tulu kati pela agizüka liasü, koba Gaza nung pua alir Israel nunger nisung asem chiokba sülen Hamas-Israel ceasefire nung tepuokdak alir melentepba mezüngbuba alitsü.

Hombarnep 1:30 ako (par mapang) meta Red Cross indang bus tem nung Palestine nunger tepuokdak alir nisung 90 ya mener occupied West Bank nung Ramallah tonga aru, kong Israel mitkar temi benjongtsü memelatsü ta shiaka nisung meyirijang aika adenshia pelatepa liasü.

Palestine nunger chioker tem rongnung tetsür 69 aser teburchanu 21 liasü, aser karbo arishi küm 12 tanura lir aser parnok ya occupied West Bank aser Jerusalem nungi liasü.

Parnok rongnung arishi küm 62 tain Khalida Jarrar dena liasü, shiba leftist Popular Front for the Liberation of

Palestine nung lenir ka lir aser "administrative detention" kübok solitary confinement nung ita trok tashi yua liasü. Administrative detention ajanga Israel ketdangsür temi temulung melemi alir maijaka mesüra court nungi obendang magütsü liaka mapang telatet makai tepuokdak ayur.

Occupied West Bank kübok Ramallah yimti nung adenshia alirtem tepuokdak nungi meyipa shilanger aina tepela agi parnok tapubang nung ajungketa liasü aser kari ola agütsü. Nisung kar Fatah, Hamas, Palestinian Islamic Jihad aser danga armed resistance teloktem indang nisan bener liasü.

Ghonda tenet tejakdang Israel tsür asem Gaza nungi chioka liasü,

Hombarnü tepuokdak nungi chiokter tem rongnung Palestine nunger osangbener Bushra al-Tawil dena liasü, shiba Israel nung tepuokdak March 2024 nungi yua liasü.

Tawil-i ashiba agi, parnok Deobarnep 3:00 ako meta Israel nunger tepuokdak tesem ka nungi agizük aser ano kati anir ao, kong

chioktsü atateba alir Palestine nunger kar liasü.

2023 küm November ita sülen Hamas aser Israel tsüngta tepuokdak alirtem melentepba ibai mezüngbuba alitsü.

Iba ceasefire tezüngzüktep nung shilem ka ama Palestine nunger kwi tepuokdak nungi chioktsü ali, aji tang tashi tejangja memetet, saka nisung 1,000 nungi 2,000 jungnüa alitsü südi ta osangtem ajanga ashir.

Iba tezüngzüktep mezüng noklem nung Hamas teloki anogo 42 tsüngta Israel nunger pua alir nisung 33 chioktsü aser Hombarnü chiokba sülen ano Honibarnü chioktsü lir.

Ceasefire noklem tanabuba atema jembishinü ya hopta ana tsüngta tenzüksü lir.

October 7, 2023 nü rara tenzüka sülen Gaza nung Palestine nunger 46,000 dak tema tepsetogo aser nütsüng yongsük shilem 90 jungnüa Israel nunger evacuation orders aser amakba ajanga tesem balala nung prokshi.

Mine nung inyaker tenet tepset

Accra, Aenjeti/January 20 (Agencies): Ghana nung Ashanti tesem kübok mine ka nung duty nung aliba sepaitem den mangatettep adokba sülen nisung tenet tepsetogo.

Ghana Armed Forces-i ashiba agi, ozüng alema miner parnok 60 AngloGold Ashanti indang mine kati tashiyim amshia ait aser sepaitem dak injang khalokja liasü.

Iba sülen sepaitemi parnok jenbotsü atema meyiper injang khaloktsü aser iba mapang nisung asüba aser yiruba ataloka liasü, ta kasa sangdong ajanga metetdaksü.

Ajisüaka miner tem tenüng nung nokdaker kati ashiba agi, parnoki prangbong bena maliasü.

Mine nung nisung asüba osang angashiba sülen Obuasi jila nung longkak ait, kong bus aika rongtoktsüogo.

Nisung tepsetba sülen jila nung alirtem mit adoka company tamendakdaka ai aser gari asem den company indang hadir balala rongtokja liasü.

Kasa mapang nung tir John Mahama-i ken o bushisüngdangtsü tetuyuba agütsüogo aser ashiba agi, nisung karidanga ozüng alema inyaksashiba ngutetra tapet temerenshi agütsütsü.

Tir sangdong ajanga iba lendong nung nisung ti asüba

metetdaksüogo.

Sorkari mining company, AngloGold Ashanti dang yirur alirtem temang anepaluba mapang intokba sen menoktsütsü aser asürtem aremstü asoshi senotsü teyari agütsütsü tetuyuba agütsüogo, aser security agency tem dang iba tesem süngjema toktsütsü atema jenjang agütsü metetdaksüogo.

AngloGold Ashanti-i ashiba agi, tensa süngjema kümogo aser parnok ketdangsürtem den angatettepa inyaksangshidar.

Company-i ashiba agi, parnok asoshi tinyaktsü tongtibangtibaji parnok kübok inyakerkem aser parnok den sendaka alirtem shirnok iba tatalokba ajanga kongshio, parnok tekümsükba kübok anema toktsütsü asoshi lir.

Ghana National Association of Small Scale Miners local mendenbuba Kofi Adams-i ashiba agi, iba lendong nung nisung teku asü aser nisung 14 kanga mejungi yirua liasü. Paisa, iba tesem nung kechi atalok aji angatetsü tasak lir, ta ashi.

Taoba mapang ozüng alema inyaksangshirtem mintoktsü atema injang khatoka liasü, ta pai ashi.

Paisa, nisungtemi pragbong bener liasü ta military-i ashiba ya shitak masü, ta ashi.

Nisung ana tasüba agi merenshi

Beijing, Aenjeti/January 20 (Agencies): November ita tatalokba balala ana nung nisung aika tepsetba atema China-i nisung ana tasüba agi merenshiogo, ta state media sangdong ka ajanga metetdaksü.

Arishi küm 62 tain Fan Weiqu, shibai Zhuhai yimti nung sports stadium ka kima nüburtem adenshia aliba tesem ka nung pa indang gari anioka nisung 35 tepseta liasü, pa Hombarnü tasüba agi merenshiogo.

Küm ter dak tema lir iba lendong ya linük nung lendong tulutiba liasü, ta ketdangsürtemi ashi. Police-i ashiba agi, balaba ken o pai mulungba ama metembangba atema Fan ya mepelai liasü.

Ano November itasa arishi küm 21 tain Xu Jiajin-i Wuxi yimti nung pa azüngba vocational school ka nung kotari agi nisung ti tepset aser nisung 17 yiruja liasü.

Police-i ashiba agi, Wu ya

tatidang nung tamakok ngua graduate mesütet aser pa inyaka aliba internship nung itasen agütsüba agia temulung mesüi liasü. Pa-a Hombarnü tepsetogo, ta state broadcaster CCTV-i metetdaksü.

China tir Xi Jinping-i local sorkar dang iba amala lendong nungi jenboa alitsü atema jenjang tapet agütsü metetdaksüogo.

Nisung ana ya tasüba agi merenshitsu atema Zhuhai aser Wuxi yimti nung December ita intermediate people's courts-i obendang agütsü aser Supreme People's Court-i agizüka liasü, ta state media-i metetdaksü.

Anüolen aliba linüktem ama masü China nung iba amala azütokshi lendong ya aibenbo mataloker, saka kümtem tsüngda China nunga iba amala ken o ya timba küma odar, aser iba ajanga China sorkar tenüng mejungi kümdaktsüogo.

Swiatek, Keys, Elina nunger quarterfinal-i iogo



Iga Swiatek

Madison Keys

Elina Svitolina

Aenjeti/January 20, 2025 (Agencies): Hombarnü Australia Open tetsür kija asaya nung Iga Swiatek-i Germany tsür Eva Lys 6-0 6-1 agi ayong ayonga koka taküm küm atema mezüingbuba Grand Slam quarter-finals-i iogo.

Grand Slam pongu tashi koker alila Swiatek iba asaya masaya tsüingda iba asayamung nung game 10 nung dang tamakok ngur liasü aser lai Rod Laver Arena nung Lys minute 59 nung dang koka la den iba asayamung takok marok asoshi tokteperitem nem osang tejangja ka agütsüogo.

La quarter nung Emma Navarro mesüra Daria Kasatkina den asayatsü.

Tetsür kija asaya tanga ka nung America tsür Madison Keys-i Margaret Court Arena nung sixth seed Elena Rybakina 6-3 1-6 6-3 agi koka Australian Open quarter-finals-iogo. La

taküm asaya teku tashi khen danga tamakok mongui asaya arudar.

Adelaide Open champion Keys ya taoba mapang Rybakina-i anabenbo koker liasü, saka Hombarnü asaya nung lai tanabuba game mekokteaka asendenshir kanga junga asaya-a asaya kokogo.

La taruba asaya Ukraine tsür Elina Svitolina den asayatsü, shiba Veronika

AUSTRALIAN OPEN

Kudermetova 6-4 6-1 agi kokogo.

Hombarnü Rod Laver Arena nung Svitolina-i Veronika ayong ayonga akok aser asaya tembangba sülen Ukraine tsür la yagi Russia tsür la den ya mesalemi liasü. Elina-i tasembuba round nung world number four Jasmine Paolini koka liasü.

La taoba mapang Wimbledon nung 2019 aser 2023 küm aser 2019 küm US Open semifinal tonga asayaogo.

Kasa asayamung tebur kija asaya nung defending champion Jannik Sinner-i Denmark nung asayar Holger Rune koka quarterfinal-i iogo.

Rod Laver Arena nung round pezübuba asayaba mapang world number one asayar yagi mezüingbuba set makokba sülen asaya ya 6-3, 3-6, 6-3, 6-2 agi koka liasü.

Maneni tebur kija asaya nung Hombarnü Ben Shelton-i France nung asayar tejen Gael Monfils koka quarter-final-i iogo, kong pa Lorenzo Sonego den asayatsü, shibai qualifier Learner Tien koka liasü.

Round pezübuba asaya ya Shelton-i kanga meranga asayar 7-6 (7/3), 6-7 (3/7), 7-6 (7/2) agi koka liasü.

Dele Alli-i Serie A club Como den tenangzüktepba yangluogo

Aenjeti/January 20, 2025 (Agencies): Dele Alli-i Deobarnü Seria A club Como den tenangzüktepba ka yangluogo. Taoba mapang England nung international asayar ya Everton-i taoba season tatem chiokba sülen tang iba tenangzüktepba yangluogo.

Serie A team Como-i sangdong ka ajanga ashiba agi, parnoki Ali den ita 18 atema tenangzüktepba ka yangluogo aser ano ita 12 atsülangtsü atema lenmang sadema lapoka yuogo. Pa ya Cesc Fabregas-i aniba team den training agitsü atema taoba küm tatem Italy-i oa liasü.

"Dele meyilongi squad-i aidaktsütsü atema pa nem teyari agütsütsü asoshi rangloker inyaktsü," ta Como-i ashi.

"Pai tanga tang kanga junga asayatsü tabo mimlar, saka pai asayaba moapu nung aser club nung lanur asayartem atema tajungshir ka ama teyari tulu agütsütsü ta club-i temulung lema bilemer," ta kasa sangdong ajanga metetdaksü.

Arishi küm 28 tain asayar ya mapang ka nungbo takok tajung anguba asayar ka akümtsü ta bilema liasü, saka pa 2022 küm January ita Tottenham Hotspur toktür Everton nung oa adenba sülen jenjang mejungi aküm. Pa season tatem tashi dang asayaba sülen taruba küm Besiktas-i loan nung yoka liasü.

Ali Everton nungi ajak senteper 13 ben asayaogo aser iba mapang goal ka danga midaktsü. Kasa mapang nung pa 2023 küm Besiktas-i loan nung oa adenba sülen mental health mejungi küma timtem ajangshia liasü.

Ali England team tenung nungi 37 ben asayaogo, saka pa tatemsa linük tenung nungi 2019 küm asaya liasü. Pa Tottenham nung asayaba mapang tajungba asayaogo, kong pa Harry Kane aser Christian Eriksen nung amala asayar tajung den asaya. Pa Tottenham nungi season tenet asayaba mapang goal 67 idakja liasü.

Como pur Serie A relegation zone-i point ka agi dang mai lir aser parnok taruba asaya Udinese den asayatsü lir.

Rohit Sharma Mumbai team nungi Ranji Trophy asayatsü



Mumbai, Aenjeti/January 20 (Agencies): India Test aser ODI captain Rohit Sharma, asayar tejen Ajinkya Rahane lenisüba nung Ranji Trophy nung Jammu & Kashmir den taruba asaya nung asayatsü.

Hombarnü Sanjay Patil-i anir Mumbai team shimertemi iba asaya atema Mumbai team nung asayar 17 shimba sangdongogo. Iba asaya ya Mumbai Cricket Association's ground, BKC nung January 23 nü nungi tenzüka asayatsü.

Rohit küm ter shi lir tang mezüingbuba Ranji Trophy asaya ka nung shilem agitsü lir aser pa den Mumbai team nung opener Yashasvi Jaiswal, Shreyas Iyer, aser all-rounder Shivam Dube aser Shardul Thakur nungera densema lir.

New Zealand aser Australia na den taoba asayamung ana nung kanga mejungi asayaba sülen Rohit tang asaya asendenshitsü merangba mapang ka lir, aser pa Jaiswal den opener asayatsü imlar, shibai tawa Australia nung oa Border-Gavaskar Trophy asayaba mapang Test pongu nung run 391 yanglua pa ajak dang run timtiba yangluba asayar liasü.

Mumbai team: Ajinkya Rahane (captain), Rohit Sharma, Yashasvi Jaiswal, Ayush Mhatre, Shreyas Iyer, Siddhesh Lad, Shivam Dube, Hardik Tamore (wk), Akash Anand (wk), Tanush Kotian, Shams Mulani, Himanshu Singh, Shardul Thakur, Mohit Awasthi, Sylvester D'souza, Royston Dias, Karsh Kothari.

Rishabh Pant Lucknow Super Giants captain kümogo



Aenjeti/January 20, 2025 (Agencies): 2025 Indian Premier League (IPL) atema Rishabh Pant nem Lucknow Super Giants (LSG) captain mapa agütsüogo, ta team indang principal kibur, Sanjiv Goenka-i Hombarnü metetdaksü.

Taoba küm Jeddah nung IPL mega auction agiba mapang Pant ya LSG puri sen crore 27 agi alizükba sülen pa ya IPL puti otsü nung sen tasaktiba agi alizükba asayar aküm.

Pa ya LSG puti otsü nung

captain pezübuba asütsü. Taoba mapang iba team ya KL Rahul, Nicholas Pooran, aser Krunal Pandya nung lenisüba nung asaya liasü.

LSG pur mezüingbuba season ana kanga takok ngua asayaogo aser 2022 aser 2023 küm IPL nung parnok playoffs tonga asaya liasü.

Ajisüaka parnok 2024 küm junga masayatet aser points table nung tenetbuba nung tembanga playoff nung asayatsü maongka monguteti liasü.

Pant tang agi IPL nung

team anabuba captin mapa inyaktsü lir. Taoba mapang pa 2021 nungi 2024 tashi Delhi Capitals (DC) captain liasü. Pa 2023 kümbo yiruba ajanga IPL masayateti liasü.

Pant küm teku tashi DC nungi asayaba sülen IPL 2025 retention deadline atongsü lia October 31 club den pila liasü. Club nung lenisüba shilem dak sendakba nung pa chiok ta club-i shia liasü.

LSG nung Pant team mentor Zaheer Khan aser head coach Justin Langer den külemi inyaktsü, shiba den pai Australia nung Border-Gavaskar Trophy asayamung asayaba mapang ajurutepogo.

Team nung pa Nicholas Pooran, David Miller, Mitchell Marsh, Aiden Markram, Ayush Badoni, Aryan Juyal, Abdul Samad, aser Himmat Singh nung amala batter tejungtem den külemi asayatsü.

Bowling department nung India nung fast bowler Akash Deep aser Avesh Khan na den ano Ravi Bishnoi, Mayank Yadav, aser Mohsin Khan nung amala asayartem densema lir.

BILEMDANGANG

"Mapa tulu tila mebendangi pei akokba inyakang."